


REPUBLIKA Y'UBURUNDI



IBIRO VY'UMUKURU W'IGIHUGU

IJAMBO NYENICUBAHIRO  
UMUKURU W'IGIHUGU  
PETERO NKURUNZIZA  
ASHIKIRIJE ABARUNDI  
N'INCUTI Z'UBURUNDI

GITEGA, ku wa 25 Myandagaro 2007

**Barundi,  
Barundikazi,  
Ncuti z'Uburundi,**

---

**TURABARAMUKIJE  
MUSANGWE AMAHORO  
N'UMUGISHA W'IMANA.**

Kw'igenekerezo rya 26 Myandagaro mu mwaka w'2005, ni ho Umukuru w'igihugu yashikira icese amabanga yo kuyobora UBURUNDI, gutyo busubira kurōngōrwa n'abategetsi bashasha Abarundi bitoreye.

Vyakwirikiye ishingwa ry'inzezo nshasha z'umutekano n'igisirikare mu mwumvikano ntangere, ari nazo zafashije mu gucungera ayo matora. Ivyo vyose vyabaye ibitangaza mu Burundi, n'akarorero muri Afrika.

Ukubisikanya ku butegetsi vyabaye mu mutekano ntangere no mu mwidegemvyo, bukaba bubaye ubwa mbere muri iki gihugu intwaro ivuye mu matora imara imyaka ibiri, **kandi turavyizeye, n'iyindi izōrēngāna.**

Ivyo vyererekana ata gukekeranya yuko Abarundi turiko turatera imbere mu gutegera ukuri aho kuri no mu kurondera kwitunganiriza ivyacu atawurinze kudutera igitsure. Turakwiye kwikeza.

Dushimira Imana Mushoboravyose idushikanye aha. Ni yo yazigamye Abarundi n'Uburundi muri iyi myaka ibiri tumaze, co kimwe n'iyindi myaka yarangiye. Ni yo kandi yama ituyobora ikatwereka ibibereye ngo tubandanye kuja imbere igihugu cayo mu nzira y'urukundo, ukuri n'ubutungane, yo nzira yonyene ishikana kw'iterambere rirama.

---

**IMANA NIHABWE ICUBAHIRO I WACU  
NO MU BIHUGU VYOSE.**

---

**Barundi,  
Barundikazi,  
Ncuti z'Uburundi,**

Turashimiye kandi amashirahamwe ataho yegamiye mu vya politike, Abakozi b'Imana, Abamenyeshamakuru, Ibihugu vy'aka karere n'ivyo mu mahanga ya kure, kuko bose bafashije, bagaterera umwe wese ico ashoboye muri iyi myaka ibiri, kugirango igihugu gishikire iyi semo kigezeko, kandi y'imbonekarimwe mu Burundi.

Leta turongoye yariyemeje kwama imenyesha nantaryo Abarundi n'amakungu, igihe cose bibaye ngombwa, ingene ubuzima bw'igihugu bwifashe. Ndabizi, kandi nama ndavyumva mu ngendo ngira hagati mu gihugu abanyagihugu bántumye kubatunganiriza bakanyibaririra amaso mu yandi uko babona ibintu biriko biragenda muri politike, mu ntwaro, mu butungane, mu ndero, mu vyerekeye amagara y'abantu, imigenderanire n'amakungu, agateka ka zina muntu, n'ibindi.

Mwirirwa murumva mu maradiyo canke mu binyamakuru, cane cane muri iyi misi, amajambo ataryoheye amatwi canke adahumuriza.

Kuri uno musi twibuka imyaka ibiri irangiye inzego zishingiwe n'abanyagihugu zihangamye, Twashaka rero Tubashikirize muri make ivyaranguwe, Tuvuge ivyatugoye, Tubashikirize n'ivyo twimirije kurangura. Mu gusozenza, Turaza gutanga impanuro n'ivyo dusaba Abarundi, inzego z'igihugu, n'incuti z'Uburundi.

## IBIKURUBIKURU TWARANGUYE

---

### 1° Ivyerekeye imigenderanire n'amakungu :

Uburundi nta gihugu na kimwe bifitaniye ingorane. Mubihugu vya Afrika, Uburundi na Siyera Leone ni vyo vyatowekeo akarorero mu gutsimbataza amahoro.

Ibihugu bitari bike vyararungitse ababiserukira aha i wacu, vyunga gutyo ubucuti ubwambere;

Imigendaranire myiza dufitaniye n'amakungu yaribonekeje mu kwakira abashitsi benshi b'icubahiro bagendeye igihugu cacu, n'abatari bwagendere na rimwe Uburundi barabwiboneye;

Twarakiriye aha mu Burundi Umukuru w'igihugu ca TANZANIYA. twongera turakira n'Umukuru atwara UBUSWISE; Twarakiriye umukuru w'Ibanki Nkuru y'Isi yose be n'uw'Ikigenga Mpuzamakungu FMI.

Kuva mu mwaka w'1993, bwabaye ubwa mbere abanyacubahiro nkăbo bagendera UBURUNDI.

Amashirahamwe Mpuzamakungu twaragiraniye imigenderanire myiza, ayandi turavyura imigenderanire nka CEPGL (Communauté Economique des Pays des Grands Lacs), ayandi nayo turayinjiramwo. Aha twovuga Umuryango w'Ibihugu vyo mu Buseruko (East African Community) n'Ihwaniro Mpuzabihugu ryo mu Karere k'Ibiyaga Binini ryuguruwe ku wa 15 Kigarama 2006 i Nairobi (Conférence Internationale sur la Région des Grands Lacs).

Inama y'incuti z'Uburundi (Table Ronde des Bailleurs de fonds) yarabereye ubwa mbere ngaha, kandi yagenze neza cane.

## **2° Ivyerekeye Intwaro yo hagati mu gihugu.**

Umutekano uriko uratera imbere mu gihugu cose. Haramaze gusubizwa ibirwanisho bicira umuriro vyābâba ibihubi icumi (10 000), ibindi navyo bitari bike bigafatwa.

Umugwi w'abahinga mu kwaka ibirwanisho abanyagihugu uramaze gushingwa, kandi uherutse kuronka uburyo buhagije bwo kurangura igikorwa wahawe. Bagiye rero kurushirizaho ingoga mu gikorwa co gutsimbataza amahoro.

Dusavye Abarundi bose kuzá baradomako urutoke abagizi ba nabi, bafashanye n'abajewe umutekano, abicanyi batuzwe ata gukebaguzwa.

Haratangujwe imigambi yo guhasha abasuma n'inkozi z'ikibi, ariko harabaye ubwicanyi buturutse ku kwihorana, abandi bagapfa amatongo, n'ibindi.

Amatongo yasahuwe be n'ibibanza vyo kubamwo vyahora bitera umutekano muke mu gihugu bigiye gutorerwa umuti, kuko haragenwe umugwi wa Leta ubijejwe (Commission Terre et autres biens). Tugasaba Abarundi ko bowitura aho gufata ingendo yo kwikomoreza ku nguvu amatongo y'abo basize, uwo bigoye akitura ubutungane.

## **3° Ivyerekeye umutekano**

Uburundi burafatanije n'ibindibihugu mu kugarukira umutekano muri Afrika (Sudani, Côte d'Ivoire) ; mu misi iri imbere, uburyo hamwe n'ibikoresho bibonetse, Uburundi buzoja gufasha muri Somaliya no muri Sudani nkuko twabisabwe n'Ishirahamwe ry'Ubumwe bwa Afrika .

Kugira ibihugu bahanahane amakuru y'umutekano, twarabandanije gukomeza ishirahamwe “ Tripartite Plus” rigizwe n’Urwanda, Uburundi , Uganda, na Repubulika Iharanira Demokarasi ya Congo.

Hagati mu gihugu, inzira zose zirarengana, kandi muri rusangi abantu barakingiwe bishimishiye be n’utwabo. Abapolisi n’abasirikare barerekanye umutima wo gukingira inzego n’ukurwanya abahiga kudurumbanya umutekano. Mbere inkozi z’ikibi zagiye ziribonekeza zozo zarafashwe ku rugero rwa mirongo umunani kw’ijana (80%), izindi ziratuzwa zirahunga.

Tubasavye gukomera ku muheto, mwisunga cane cane discipline n’amategeko abagenga. Mwime amatwi abarota kubacanishamwo na basesankuyoze mubamenyeshe ko “amase ya kera atagihoma urutaro”.

#### **4° Ivyerekeye indero**

Abarundi bayamaze bati: “Iziza guhona zihera mu ruhongore!”

Kugira ngo dutegure neza kazoza k’urwaruka, harafashwe ingingo ifasha abakene ikongera ikarwanya akarenganyo n’ugukumirana: ukwigisha ku buntu abana bose bo mu mashule matomato.

Uwo mugambi ugeze ku ntambwe ishimishiye, kuko abana batangura umwaka wa mbere caragwijijwe na kabiri.

Harafashwe ingingo yo kwigisha igiswahiri n’icongereza mu mashule matomato, kugirango urwaruka ari rwo Burundi bw’ejjo ruze rworoherwe n’ukuja kurahura hanze, nakare ngo akanyoni katagurutse ntikamenya iyo bweze.

Harubatswe amashule matomato menshi mu gihugu, ayari yarononekaye mu rwimo ariko arasanurwa.

Turashimiye abavyeyi bitavye akamo twabateye ko kwiyubakira amashule. Leta izoguma igeregeza uko ishoboye kwose mu kubaronsa amabati.

Ibikoresho vya nkenerwa bigenda biraboneka : intebé, ibitabu, amakaye, n'ibindi.

Twaragwijije igitigiri c'abigisha, n'uburaro bw'abigisha buriko burubakwa ku mashule hirya no hino mu gihugu.

Tuboneyeho gusubira gushimira amashirahamwe n'ibihugu vyafashije muri ico gikorwa. Aha twovuga nk'ishirahamwe UNICEF, ibihugu vya Uganda , UbuFaransA, n'Ubushinwa.

Amashule yisumbuye amwamwe ariko arubakwa.

Mu bijanye na Kaminuza, ingorane z'abarimu n'iz'abanyeshule zagiye ziratorerwa umuti uko bukeye, uko bwije.

Ibigo vya Kaminuza biriko birasubirwamwo, ibindi birâgurwa, inyigisho nazo ziriko ziranonosorwa kugira zijane n'ibihe tugezemwo.

Turabeshuje ibihuha bikwiragizwa ngo Kaminuza igiye kuja mu minwe y'abikorera utwabo. Abadukanye ico kinyoma ntituramenya ico barondera, ariko ivyo ari vyo vyose, si abashaka ineza y'urwaruka.

## **5° Ivyerekeye amagara y'abantu**

Umugambi wo kuvuza ku buntu abana bari musi y'imyaka itanu wararushirijeho gutera imbere, gutyo abavyeyi bibaruka batishoboye be n'abana bagashobora kuvurwa mu gihugu cose.

Igitigiri c'abana bitaba Imana bakiri bato caragabanutse bimwe biboneka.

Umugambi wo kutarihisha abavyeyi bibaruka warateye intambwe nziza, nabo abahora bahitanwa n'imbanyi baragabanutse bimwe biboneka. Abahora bivuza babanje kugurisha agatongo canke agatungwa vyaraheze ubu.

Turashimiye cane ibihugu bigenzi n'incuti zadufashije mu kuturungikira imiti n'abaganga.

Turashimiye bimwe bidasanzwe Ubwongereza, Ubushinwa, Nijeriya, Amerika, Ubugiriki, Côte d'Ivoire, n'Ibanki Nkuru y'Isi yose (Banque mondiale) kuko badufashije bimwe biboneka mu mugambi wo kwitaho ukurúta amagara y'abantu, n'ubu bakiriko.

Tubasaba ko bobandanya kudushigikira no kudufata mu mugongo muri iyo migambi, kugira dushobore kuvuza abana n'abavvyeyi bibaruka, mbere bize bidufashe mu misi iri imbere gufata n'izindi ngingo zorohereza abanyagihugu muri ico gisata.

Tuboneyeho akaryo ko gusubira gutera akamo Abarundi bari hanze, bâba abahinga mu buvuzi canke abize mu bindi bisata, ngo bibuke batore ikibereye bokora kugira bateze imbere igihugu cabibarutse.

## **6° Ivyerekeye umugambi w'amahoro.**

Umugambi wo gushira mu ngiro amasezerano yo guhagarika intambara LETA yagiraniye n'umuhari PALIPEHUTU-FNL wari umaze gushika kure.

Twoshimira mbere uwo muhari ko wagerageje kwubahiriza ayo masezerano, ukirinda kuzá urasotorana. Ariko bamwe muri bo barihaye gutoteza abanyagihugu no kurenga kuri ayo masezerano, Tukaba Tubasavye kubireka, kandi bazobibazwa.

Naho PALIPEHUTU-FNL iherutse kwiyonjorora muri wa mugwi ujejwe gucungera ishirwa mu ngiro ry'amasezerano (MCVS),

Twarateye akamo uwo muhari ngo ugaruke tubandanye ikivi kugira tugisozere.

Turasavye umuhuza, ibihugu vyo muri aka karere n'abandi bose vyobangukira, ngo bakore uko bashoboye kwose bagondoze umukuru wa PALIPEHUTU-FNL, RWASA Agato, aze i Bujumbura kugira dukorane, dukorere hamwe muri uwo mugambi wo gushira mu ngiro ayo masezerano nkuko yari yaravyemeje mu mubonano twagiraniye amakungu akoranye ; häri ejo bündi i Dar Es Salaam , kw'igenekerezwa rya 17 Ruheshi umwaka w'2007.

Turateye akamo RWASA Agato ngo atahure yuko amasezerano ashirwa mu ngiro n'abarôngöye abändi ; si ivyo gutuma abatwarwa.

Wa mugwi ushinzwe kwiga ibijanye n'ugushira mu ngiro amasezerano (MCVS) ni wo ujejwe kwiga ibibazo bishobora kwaduka mu nyuma, maze ibibananiye bigatorerwa umuti n'ababakurira ku ruhande rumwe rwose, nkuko twari twabisezeranye.

Abarundi bose baranyotewe amahoro, mbere na PALIPEHUTU- FNL irayakeneye.

Leta nta kintu na kimwe itazokora kugira amahoro n'umutekano bitsimbatare mu gihugu.

## **7° Ivyerekeye ubutungane.**

- Abanyororo bamaze kurekurwa si bake, kandi ico gikorwa kirabandanya.
- Imanza nyinshi zäciwe zärakwirikijwe, amategeko yarubahirijwe.
- Ku vyerekeye abasirikare bagirizwa amakosa, nta muntu n'umwe ari hejuru y'amategeko. Abo bose bagiwe n'amakosa bategerezwa gufatwa bagahanwa.

- Ku bagiye kugumura no guteranya abanyagihugu i Muyinga no mu Kirundo, umugwi washinzwe waramaze gushikiriza icegeranyo c'ivyo watohoje. Ico cegeranyo carashikirijwe ubutungane. Imanza zigiye gukwirikira, abakekwako akabi babahanure canke babacire urubanza vuba, abera bere, abagiriwe n'amakosa bahanwe hisunzwe amategeko.

Dusavye ko imanza zose zimaze gushika mu masentare zonyaruka zigacibwa vuba, abahanwa bagahanwa, abambikwa izera, bakazambikwa.

- Abarundi bose basabwe guhagurukira abarya ibiturire, abonona itunga ry'igihugu be n'abanyonyezi, babashengeze mu nzego zimaze gushingwa ngo zihashe mwene ivyo vyaha. Muri iyo ntumbero, hagiye gushirwaho Brigade icenda (9) mu gihugu cose.
- Leta n'inzego zayo ziyemeje gutuza bimwe biboneka ako karanda. Turatanguje urwo rugamba.

## **8° Ivyerekeye Ubudandaji n'amahinguriro**

- Itegeko riraba « duwane » (code des douanes) ryarasubiwemwo.
- Itegeko ryerekeye amasoko ya Leta riri mu nama Nshingamateka.
- Kubera twasanze ibintu vya Leta bigurishwa intica ntikize, ivyo bikaba ari ubusuma mu bundi, itegeko rijanye n'ukugurisha amatungo ya Leta rigiye gushingwa vuba.
- Hariho ingendo Leta yafashe yuko amashirahamwe amwamwe aja mu minwe y'abikorera utwabo. Mu ntango benshi ntibategera iciza cavyo, ariko mwomenya ko bibanza kwigwa neza.

Akensi Leta ntivamwo rwose, igabanya umutahe gusa, ikaguma icungera ngo ntibivemwo inkwirikizi mbi ku banyagihugu n'igihugu. Akarorero tubahaye, ni igitata c'ikawa.

- Ariko bibaye ngombwa, ivyo Leta idashoboye izobivamwo ata gukekereza.

## **9° Ivyerekeye ubutunzi**

- Leta Turongoye yarakoze ibitari bike kugirango ubutunzi bw'igihugu bwiyongere. Tugereranije ivyinjiye mu gice ca mbere c'uyu mwaka w'2007 be n'uw'2006, igikega ca Leta cungutse kuva ku bice umunani kw'ijana gushika ku bice icumi kw'ijana (8-10%).
- Ariko haribonekeje ubusuma budasanzwe. Mu bivugwa cane mwarumvise nk'ibijanye n'indege Falcon 50 yagurishijwe bidaciye mu mategeko, hakaba n'amafaranga yarishwe ishirahamwe Interpetrol mu buryo budatomoye.
- Uwarishe ayo mafaranga yabeshe ngo yariko arashira mu ngiro umugambi bari bumvikanye n'Ikigega Mpuzamakungu FMI. Si vyo namba, ni ikinyoma, turabineshuje icese. Mw'itohozozza ryabayе, twasanze atavyo bari bavuganye, yabikoze ku ruhara rwiwe. Na Leta ntiyigeze ibimutuma.
- Tuboneyeho rero akaryo ko guhumuriza abanyagihugu. Abo bose basesagura itunga rya Leta canke bakarisahura, bagiye guhanwa bimwe bikomeye hisunzwe amategeko agenga Igihugu cacu muri ico gisata.
- Twarashinze amategeko atari ahaszwe ngo duhashe Bakaboko n'abanyuruza itunga ry'igihugu. Inzego zibijejwe zarabonetse, n'uburyo bukwiye buherutse kuboneka.
- Ubu rero izo nzego zigiye gukora, zirwanye zivuye inyuma abamaze itunga ry'igihugu, zihashe Bakaboko, zibahige kuva mu mwaka w'2000.

- Mu ntumbero y'ukumenya ivyabaye n'ukwongereza itunga rya Leta, harategekanijwe gusubiramwo itegeko ritunganya ikoreshwa ry'amahera ya Leta (Loi Organique des Finances), Itegeko ryerekeye itozwa ry'amakori n'amatagisi ya Leta (Code Général des Impôts et Taxes). Iryo tegeko rya nyuma rizotuma abagwizatunga boroherwa, ubutunzi bw'igihugu nabwo buhatorere akōyōko.
- Harategekanijwe ivyigwa bisabwa abahinga vyo gutohoza ukuntu abadändaza b'ibitoro bakora n'ivyo baronka (Audit du secteur pétrolier), ivyo bikazotuma tumenya neza amafaranga Leta iheranye nâyó iheraniwe (dette croisée); hazoba n'ugutohoza inzira amahera ya Leta acamwo mu gusohoka (Audit de la Chaîne de la Dépense).
- Mu bijanye n'amafaranga twahebewe kubera igihugu cacu cari mu myenda y'umurengera kandi gikenye (PPTE), nahó nyene hazoba ivyigwa bitohoza ko ayo mahera akora ivyo yagenewe, ni ukuvuga kurwanya ubukene, kwubaka amashule n'amavuriro, gukwiragiza amazi meza mu gihugu, n'ibindi mwene ivyo.
- Ingingo zibereye zaraflashwe, nko gushinga yuko Ubushikiranganji bw'ikigega ca Leta buba ari bwo buharura imishahara y'abakozi ba Leta bukongera bukabahemba.

Ivyo bizotuma ya mafaranga yahora asohoka guhemba amazina y'abakozi batabaho aguma mu kigega, gutyo ako kageso kabi gace kazimangana.

- Kugirango vyorohe gukwirikiranira hafi ibikorwa vya duwane, ibisata vyose bigiye gukoresha bwa buhinga bushsha (ordinateurs).

Hagiye gushingwa igisata kijejwe kurondera amafaranga yinjira (office des recettes), hongere hatozwe tagisi zo ku nyungu (taxes sur la valeur ajoutée).

---

## **10° Ivyerekeye ukumenyesha amakuru**

Umukuru w'ighugu yaragiraniye n'abamenyeshamakuru inama zitari nke, kandi zarabaye ingirakamaro

Mu ntumbero yo guha ijambo abanyighugu, umugambi wo kuremesha ikiganiro gica ku maradiyo yose aho umunyaghugu wese abaza ikiri ku mutima Twarawuranguye, kandi iyo ngendo tuzoyibandanya, kuko bifasha abanyaghugu kwivuganira n'Umukuru w'ighugu, maze inyishu zihuta zikaboneka.

## **11° Ivyerekeye uburimyi n'ubworozi .**

- Ahatari hake, abarimu b'indimo barasubijwe mu kazi, umwavu wa kijambere nawo uragabanurwa igiciro.
- Urudandazwa rw'ibiterwa njabukamazi rwaratunganijwe gusha, kandi amahera arongerekana ku murimyi.
- Haratanzwe ibitungwa vya kijambere kugirango umwimbu wongerekane muri ico gisata, n'isi isubire kumera.

Dusavye abanyaghugu gusubira kwijukira ya mikobeko irwanya inkukura, bongere bagwize umwavu uvuye muri za nyabarega.

## IVYATUGOYE

- Hari ingorane z'abanyagihugu n'imigwi batunze ibirwanisho, bakabikoresha ububisha ;
- Haribonekeje abantu bakoresha nabi itunga rya Leta, abandi bararisahura , ivyo navyo bigaturuka ku mategeko mabi twarazwe, ahá uburenganzira abashikiranganji bwo gufata ikigega ca Leta uko bishakiye ;
- Abanyamigambwe baracanyemwo, bituma ibikorwa vy'Inama Nshingamateka bigenda biracumbagira ;
- Umuhari PALIPEHUTU-FNL ukwega ibirenge mu mugambi wo gushira mu ngiro amasezerano ;

Izo ngorane ntitwozirāndīrakó, kandi ntizoduca inkokora.

Tumenyesheje Abarundi yuko ingorane twabonye ari ibibazo bisanzwe tuzôgênda turatôrera umuti. Tuzokwama dukora kugirango inyishu z'ivyo bibazo ziboneke, kandi dufashanije n'incuti.

Nkako, inyishu z'ibibazo ntizishobora kubonekera umusi umwe, zizogenda ziraboneka uko bukeye uko bwije, kandi umurundi wese abifisemwo uruhara, kuko ari twese twabiteye. Ko atari abavuye hanze badusutse muri uru rushanga, nta n'umwe yokwidohora muri ivyo bibazo.

- Dusavye abajejwe politike, na canecane abarongoye imigambwe ko bofasha bimwe biboneka mw'itsimbataza ry'amahoro n'umutekano mu gihugu, vyo soko ry'iterambere kuri bose.
- Twiyemeje ko ibibagoye tuzokwama tubijamwo inama n'ingingo hisunzwe amategeko, cane cane Ibwirizwa Shingiro.

Ni muze dukeburane, Uburundi burimwo abagabo bakunda igihugu cabo, umugabo nawe ni ubonekera mu bikorwa vyiza akorera Uburundi n'Abarundi.

- Ivyerekeye gukura ba Musitanteri bāgírizwa amakosa, harashinzwe umugwi ujejwe gutohoza ivyashitse vyose. Uwo mugwi warakoze akazi wari wasabwe, kandi warashikirije icegeranyo. Ico cegeranyo carizwe mu Nama Nshikiranganji, ari ho hapfunditswe ingingo zikwirikira :

Gutosora Ibwirizwa rigenga amakomine, kugirango ryubahirize ba Musitanteri mu bikorwa vyabo, no kugira kandi ingorane zātumye bamusitanteri bakurwa mu kazi ziveho.

Turarindiriye ko Inama Nshingamateka iryemeza.

- Ba Musitanteri batari bake bagirizwa ubusuma n'ukurya ibiturire. Kuri abo, twasavye ko Ubushikiranganji bw'Intwaro ibereye n'Ukugendura imirimo ya Leta bubenonosora neza, abagirizwa ubusuma n'ibiturire bakarengutswa imbere y'ubutungane.

Abo bazosanga ataco bāgīra bazosubizwa agateka kabo hisunzwe Ibwirizwa rigenga amakomine. N'amakosa azoba yatewe n'ugusubiriza abakuwe, canecane mu vyerekeye kwubahiriza ibitigiri mu vy'amoko n'ibitsina , azokosorwa.

- Tuzobandanya ingendo yo kuja inama n'ingingo, nkuko tugiye kubitangura muri vya bikorwa vyo kubaza Abanyagihugu ibijanye n'ukuri be n'ukurekuriranira, mu gusubiza hamwe.

Ico ni ikibazo c'Abarundi bose. Nta muntu canke umugwi kanaka numwe yorondera kucigungana. Turararitse Abanyagihugu bose ngo bitabe ibiganiro vyimirije gutangura kuri ico kibazo c'inkoramutima.

Inyishu, iviyumviro vy'abanyagihugu, ni vyo bizofasha mu gutsimbataza inzira ya demokarasi, amahoro n'ubutungane.

- Dusavye Abarundi kugumiza umutima mu nda, kubandanya imirimo yabo ya misi yose báremye, ntihagire abaha amatwi abazana ibibaca intege, kuko naho ingorane zobaho, zifise intango zikagira n'iherezo.

Utubazo dutoduto turiho tuzotorerwa umuti, kuko uravye ingorane twaciymwo mu myaka iheze, zavuyemwo amaganya menshi, ntawobigereranya n'ubu.

Hariho ubudasa, kandi twese turavyemera.

## **IVYO TUGIYE KURANGURA.**

- Twiyemeje kuja inama n'abanyagihugu n'amakungu kugira dushikire intambwe twiyemeje muri wa mugambi w'imyaka mirongo ibiri n'itanu « vision 20/25 ».
- Ivyubaka igihugu tuzokwama tubivugira ahabona, aho kubivugira mu kinyegero, mw'ibarabara, mu kanywababo canke mu bunywero.
- Ku ruhara rwacu, twiyemeje kwama duharanira inyungu z'Abanyagihugu, kandi tuzokwama twumva tukumviriza abo bose bafise iviyumviro vyubaka, vyubahiriza inyungu z'abanyagihugu.
- Ibiyago vyose bifata iyo ntumbero tuzobishigikira ;  
Inyungu za bamwebamwe tuzozitwararika inyuma y'inyungu z'igihugu n'Abarundi.
- Tugiye kwiga vuba itegeko rishinga Sentare Rubamba ihasha abasuma n'abicanyi bakoresha ibirwanisho, be n'abafata ku nguvu abana n'abakenyezi.
- Tugiye kwiga vuga ingene ugukundisha igihugu urwaruka biba umugambi, maze nabó bitwararike umutekano w'igihugu nkuko

- tubibona mu bindibihugu , ni naho amahoro n'umutekano bizarama bikanaba umwitwarariko wa twese.

Umugwi ugiye kubinonosora warashizweho.

- Umugambi Leta yiyemeje wo kugendera abanyagihugu no gusanga abakozi ku kivi twarawubandanije, n'ubu tukiriko.
- Dusavye Abarundi kuza baritaba izo nama, kuko vyaragaragaye yuko ari ingirakamaro.

- Nkuko twamye tubivuga kandi tukabishira mu ngiro, tuzoshishikara guharanira ubutegetsi bw'abanyagihugu no gutsimbataza amahoro arama mu gihugu cose.
- Abatovyi ntibihende. Ntawuzoducana umutaru, ntawuzoduterana intambwe yo kudusubiza mw'ihumbi, mu gutera akajagari canke intambara, kuko twariyemeje kubisezerera no kubirwanya.
- Ivyo twemereye Abarundi yuko uwuzokora neza tuzomushimira twarabibandanje mu gutanga udushimwe ku vyiza bakoreye Uburundi n'abarundi, kandi ntituzobidohokako.
- Tuzobandanya umugambi uruta yose wo kunywanisha Abarundi, gusanura igihugu no kugiteza imbere, gukomeza umutekano n'imigenderanire myiza.
- Tuzokwicarira ibibazo vyagoye igihugu kugira tubitorere umuti ushimisha bose, haba mu bijanye na politike, ubutunzi, imibano, ubutungane, n'ibindi.
- Turasavye Abarundi bose gushishikara kwubaka igihugu cabo casinzikajwe n'intambara hagati y'abonse rimwe, basanure amazu, basanure n'imitima.

- Amakungu n'incuti z'Uburundi baracadufise ku mutima, kandi baratwizeye. Bazobandanya kudufata mu mugongo, kuko ivyo twiyemeje baboná ko turiko turabirāngūra - naho hari utwagiye turacamwo - kandi twama twabonanye. Ntibasiba kutwemerera yuko bazogumana natwe, kandi barabikora, ni ivyo mwama mwibonera.

Turashimiye Ishirahamwe Mpuzamakungu ONU n'Inama Ishinzwe Umutekano yaryo, tukōngera tugakengurukira Ishirahamwe rya Afrika kuko bahanuye RWASA Agato ngo agaruke mu biganiro.

- Dusavye dushimitse Abashingamateka gutora amategeko, na canecane ayafasha gutorera umuti ingorane turimwo. Aha twovuga ayihuta nk'irigenga amanama y'igihugu be n'irishiraho Umuhuza w'Abarundi (OMBUSMAN), yose ategekanijwe mw'Ibwirizwa Shingiro. Yose yarashikirijwe. Ni naho ingorane zimwezimwe zoza ziratorerwa umuti ata kajagari.
- Abanyagihugu bokwama bafatanye mu nda, bakama bima amatwi Basesankuyoze aho bari hose.

Turahumurije Abarundi n'incuti z'Uburundi. Kuri ivyo vyose bizoba bifise intumbero ihushanye n'Ibwirizwa Shingiro, Tuzobanza kubaza Abarundi bo bene kuritora bakaba na bene ubutegetsi.

Turabona ko hari ivyipfuzo vyo kuronka Ibwirizwa Shingiro atari iryo kuva mu ntambara gusa, ahubwo rijanye no gutsimbataza amahoro.

**Barundi,  
Barundikazi,  
Ncuti z'Uburundi,**

---

**Twashaka dusozere dutanga izi mpanuro:**

- Inama n'ingingo ni vyo bikuru, kandi ibigiye inama bigira Imana. Mu gihe umuntu rero abona ko yarenganjwe, yokwitura ubutungane kugira bumurenganure aho kwitura ibarabara n'ibimenyeshamakuru gusa.
- Imigumuko canke ubugarariji, ni ingendo dukwiye gusezerera, kuko vyose bitegerezwa kwisunga amategeko.
- Hárihó amategeko atameze neza, turafise inzego zijejwe kuyahindura no kuyasubiriza. Ni Inama Nshingamateka na Nkenguzamateka.

Inama Nshikiranganji ni yo itanga amategeko yipfuza ko yokwigwa akemezwa.

- Tuboneyeho mbere akanya ko kwibutsa izo nzego. Abagize Inama Nshingamateka, tubasavye gugendera ababatoye, ni co cipfuzo abanyagihugu badutumye .

Nkuko Ibwirizwa Shingiro ribitomora mu ngingo yaryo y'149 mu gace ka mbere: uwumaze gutorwa aserukira Abarundi bose, ntaba agiserukira umuwi uyu canke uriya, umugambwe canke ikindi. Abarundi bose bafise uburenganzira bwo kubatumako ngo mubasigurire uko ivyo babatumye biriko biragenda.

- Mu Nama Nshikiranganji yo kuri uyu wa 14 Myandagaro 2007, twafashe ingingo isaba Umushikiranganji wo kumenyeshamakuru ngo ashire mu ngiro ibi bikwirikira : ibikorwa vy'Inama Nshingamateka n'Inama Nkenguzamateka vyokwirikiranwa n'abanyagihugu bose ku maradiyo no mu mboneshakure, nkuko

bigenda mu bihugu bitari bike. Ivyo birafasha abanyagihugu kumenya ibiriko birakorwa n'abo bitoreye.

- Nta muntu numwe akwiye kugirisha inama atabifitiye uruhusha. Ku vyerekeye inama z'imigambwe, twarasavye Umushikiranganji w'Intwaro yo hagati mu gihugu n'Umutekano ngo ategure urwandiko rwerekana neza uko izo nama zisabwa, n'uko zemererwa. Azobicisha mu nama azogirana n'abanyamigambwe, bazomubarira ivyiza babona ko bikwiye.

Duhamagariye Abarundi bose kwijukira ibikorwa, umwe wese mu murimo ashinzwe. Ntituvyiyobagize, ukutijukira ibikorwa bizana insaku n'ivyiyumviro bibi.

Tuboneyeho akanya ko gushimira amakomine yakoze neza, ayandi makomine akaba yobafatirako akarorero :

Komine BISORO muri Provensi MWARO ;  
 Komine GIHARO muri Provensi RUTANA;  
 Komine KIREMBA muri Provensi NGOZI ;  
 Komine KAYOGORO muri Provensi MAKAMBA;  
 Komine MPANDA muri Provensi BUBANZA.

Muri iyi ntwaro, umwe wese azoshimirwa ku kivi azoba yarakukije, si ku karimi n'amajambo

Muri kino gihe Abarundi bahunguka ari benshi, turarikiye umwe wese guterera icofasha kugwiza umwimbu, kugira imvura canke uruzuba ntibibe intandara yo gusubira guhunga.

Abajejwe kubungabunga ikigega ca Leta basabwe kwama barikanuye, umwe wese arye ivyo yabiriye akuya. Bitagenze uko, uwivye ategerezwa gufatwa, agakwirikiranwa, agasubiza ivyo yahembwe canke yahawe atabikwiye.

Ba kaboko bategerezwa guhanwa bimwe biboneka.

Nazo inkozi z'ikibi zifatwa zakoresheje ibirwanisho hanyuma zikarekurwa zitaracirwa imanza zizosubira gufatwa, mbere n'ababarekuye inzego zibijejwe zirabe ko ata vyo basangiye, nkuko twabisabwe n'abanyagihugu.

### **Ntitwosozera tudasubiye gushimira Imana.**

Turashimiye n'incuti z'Uburundi, Ishirahamwe Mpuzamakungu (ONU), Ishirahamwe ry'ibihugu vya Bulaya (Union Européenne), Ishirahamwe ry'Ubumwe bwa Afrika (Union Africaine), Ibanki y'isi yose, eka n'abo bose bemeye kudufata mu mugongo muri ya nama y'ugufasha Uburundi iherutse.

Abo bose batiziganya mu kuduterera agacumu k'ubumwe mu nzira y'intwaro ya demokarasi, turabakengurukiye.

Turashimiye abajejwe umutekano, Abarundi n'abanyamahanga baje gufasha, abo bose barajwe ishinga no guteza imbere Uburundi, kwitwararika amahoro n'umutekano mu Burundi, mu karere, ndetse no kw'isi yose.

Túrāvye inzira twaciymwo, Abarundi tworema, kuko ibibazo bihari ubu ari ivyo kurêngera. Intambara nta kibanza ifise mu Burundi, kuko twaramaze kubonako ata nyungu irimwo atari ukugwiza amaganya, impfuvyi n'amarira. Nta numwe yovyipfuza, kiretse umwansi w'Uburundi.

Turashimiye abamenyeshamakuru ku ruhara bagize mu gutohoza ivyo bagiye barashikiriza, canecane mu maradiyo, ariko twobasaba kwirinda guca imanza.

Turakengurukiye kandi abakozi b'Imana batibagira na rimwe gusengera Uburundi n'Abarundi.

---

Dusavye amakungu kubandanya badushigikira kugirango natwe dushobore kubandanya iyi ntambwe tumaze gushikako, kugirango kandi amahoro atsimbatare mu Burundi ukuruta, twongere dushikire ivyo twabashikirije.

**IMANA IHANGAZE UBURUNDI  
YONGERE IBAHEZAGIRE MWESE,**

**MURAKOZE.**